

**Kanton Sarajevo
Skupština Kantona Sarajevo
Aljoša Čampara Klub SDA**

**Služba za skupštinske poslove
Skupštine Kantona Sarajevo
Ministarstvo za obrazovanje, nauku i mlade Kantona Sarajevo**

Predmet: Zastupnička inicijativa za donošenje propisa o zabrani upisa djece u vrtiće i škole koja nisu vakcinisana

Poštovani,

Zbog trenutnog povećanog broja oboljelih, djece ali i odraslih, od morbila u KS, predlažemo da se pokrene inicijativa donošenja PROPISA o zabrani upisa djece u vrtiće i osnovne škole u KS za djecu koja nisu vakcinisana.

Naime, to je praksa u mnogim evropskim zemljama i SAD-u jer je to jedini način da se kao društvo pobrinemo za kolektivni imunitet našeg stanovništva. Predstavnici međunarodnog fonda za djecu (UNICEF), Ujedinjenih naroda (UN) i Svjetske zdravstvene organizacije u BiH, također su se oglasili povodom zabrinjavajuće situacije u KS u vezi epidemije morbila, i pozvali stanovništvo da se vakciniše.

Vakcinacija stanovništva je jedno od najvećih medicinskih dostignuća modernog doba i ubraja se u najsigurnije medicinske intervencije.

Uvođenje vakcinacije predstavlja najuspješniju javnozdravstvenu mjeru, koja je spasila i spašava više ljudskih života nego bilo koja druga medicinska intervencija u povijesti medicine. Svjetski eksperti stalno upozoravaju na opasnost situacije i ozbiljnost mogućih posljedica u slučaju pada vakcinisanosti djece te je jasno ukazano što je potrebno učiniti da do toga ne dođe.

Odluka o vakcinaciji djece nije i ne može biti isključivo pravo roditelja. Pravo djeteta na zdravlje i na najvišu moguću zdravstvenu zaštitu iznad je prava roditelja na izbor. Takođe, moramo znati da nevakcinisanje ne ugrožava samo osobu koja nije vakcinisana, ono ugrožava zdravlje cijele populacije.

Antivakcinalni lobi je uspio proširiti sumnju da se vakcina protiv morbila povezuje sa Autizmom, iako Svjetska zdravstvena organizacija, kao krovna institucija što se tiče zdravstva u cijelom svijetu, kategorički odbija tu povezanost i apsolutno preporučuje vakcinaciju kao jedini mogući način prevencije od ovog, ali i mnogih drugih zaraznih oboljenja.


Moramo vratiti pravo medicinskoj struci da ona, a ne laici i priučeni, daje preporuke o načinu liječenja i prevencije oboljenja. Medicinski stručnjaci, prije svega, infektolozi, epidemiolozi, i pedijatri širom svijeta preporučuju vakcinaciju pozivajući se na Evidence based medicin, tj. medicinu zasnovanu na dokazima. Medicina zasnovana na dokazima je pristup medicinskoj praksi koji ima za cilj optimizirati odlučivanje naglašavajući upotrebu dokaza iz dobro osmišljenih i dobro provedenih istraživanja. Ona zahtijeva da samo najjače vrste ispitivanja mogu dati snažne preporuke.

Stoga, donošenjem jednog ovakvog PROPISA smatramo da bi mi kao najviše zakonodavno tijelo u KS pomogli medicinskim profesionalcima da sprovedu zaštitu stanovništva KS od zaraznih oboljenja, na osnovu preporuka i stavova zvanične, konvencionalne medicine.

Inicijativa je zasnovana na federalnom zakonu o zaštiti stanovništva od zaraznih bolesti

S poštovanjem

Podnosilac inicijative



Aljoša Čampara,
zastupnik u Skupštini Kantona Sarajevo

Sarajevo, 26. 3. 2019. godine